

# Pedrocca ima teppe dsotodecca

## 2 Pedro

Pedropa jodiideni Jesodsa jehe quinajaridenidsa ima teppe onihi dsodo inapomajaro. Pocca ima teppedsa mari icanabaquijari, poccadeni jeheniji todacorani nanijine. Diodsa madimanahissa tahijine naco mari icanabaquijari. Ima onihipi Jesocristo ccanipomahicca ima dsodo inajaro.

### Pedro nija najari

**1** <sup>1</sup>¿Nija ohuemecotedeni? Ohuapi \*Ssino-Pedro, Jesocristocca dodosse ojajaro. Pocca marinaja mari ocanabaquui-ridsahijine ohua cadossejari. Nadsapi occa ima teppe tiadenidsa dsodo onapomajaro. Jesocristopa icca Dio, ia Tonassajade. Pohuapa tiadenidsa bica tajari, pocca ima tiadenidsa pajiranissa tajaro. Pohuajinena pohuadsa pajissa tiquinajaro, pina ia pohuadsa pajissa inajarossa tiquinajaro. <sup>2</sup>Diodsa tinoccodeni tojidsera-dsanaponijine, ia Medsede Jesodsa naqui tinoccodeni tojidsera-dsanaponijine titohuideni Diodsa huati huati odsanapojaro. Pohuapa tiadenidsa ima bicani inanadsanapona. Tibodidenidsa naqui pocca jonehe tojadsanapona, onajaro.

### Diopa icca madie bica taniijine ibodi acco tocamabaquijari

<sup>3</sup>Dio pocca dacorehedsa ibodi acco tocamabaquijari, icca madie Pohuadsa inananijine. Pohua jipa tahiccassa inananijine naqui

ia tonapajira-baqquihissa tajari. Dio ibodi acco tocamabaquijari-jine Jesodsa nahatoqquri inajaro. Jesopa pocca deni tojehe, pocca biquehe icajinijine ia huahua tabaqquijari. <sup>4</sup>Diopa pocca dacorehema Pohua huati tapojaricca \*ima bicani iadsa da inajaro. Najaro pocca danijipi deni tojanicca, bica tani. Najaro iadsa tojajaropi pina Dio Pohuassa inanijine, ajijaro namicca tabaccorehe tohuini inajarocadsa naqui dsori icanirenijine. <sup>5</sup>Nema nadsapi ticcadeni jeheniji todacorani nanijine disseraqquri tiquinaji. Ima bicanira tinamanaji. Ima bica tanicca, Dio jipa tahicca nahatoqquri tiquinanijinepi Diocca tohuatthetohui disseraqquri tiquinaji. <sup>6</sup>Tibodidenidsa tohuini tiquinanicca tabaccorehedsa poni tiquinanijine ticahatteraji. Ima ocassera taniccadsa, ima najo taniccadsa tedimana-jeradsa mohuara-dsa tonahanade ticahatteraji. Ticcadeni madie Diodsa tinamanandsapi Pohua jipa tahiccassa tinamanaji. <sup>7</sup>Ticcadeni madie denima bica taniijinepi timecotedeni Jesodsa jehe quinajaridenidsa bicaqquri

tiquinaji. Nema tiquinadsapi madija huapimadsa naqui tetideni huanaqquiri naji.

<sup>8</sup>Jehe, najaro ima bicani onihi onihi ticahatteradsa, ticcadeni madie Diodsa tobicadsanapodsapi ticcadeni jeheniji ponima toja-jeranijine. Ia Medsede Jesocristodsa nahatoqquiri tiquinadsapi pajissa ticcadeni madiedsa ahuato tanitohui. <sup>9</sup>Naraha madija Jesodsa jehe naraha ima bicani tohuattera tararipa pocca madie Diodsa tobica-jerajaro. Pina mitta-jarajarissa najari. Puhuapa pocca imasiri tahidecca Dio epeje inanapojaro huati ajamajari. <sup>10</sup>Ohuemecotedeni, Diopa Pahuadsara iboraqquiri tiquinanijine tiadeni huahua tabaqqijari. Pocca madija tique-jenanijine tiadeni tocattejjidsabaqqijari. Pajissa pocca madija tiquejena-dsanaponijine tohuini tiquinadsapi denima tidisseramanani naji. Nema tiquinadsapi imasiridsa tiedimamana-jerani-tohui. <sup>11</sup>Nadsapi nidsa dsotode Diocca cacahuehe jiquejeranicadsa bacco tiquinadsapi Dio huatidse-dsa noccobiji nemanehi tiadenidsa icanahabanitohui. Nanidsa jai tijedsimadsapi ia Medsede, ia Tonassiajade Jesocristopa tiadeni tohuacahuabaqqi-dsanapohuitohui.

<sup>12</sup>Jehe, ticcadeni jeheniji todacoranijinecca ima timittamanapode. Najaro marinaja pajissacca tiadeni mari tocana-baqqidsa pajissa jehe tiqinanissa taraha tetideni ajima-jeranijine tiadeni maride dissera onanitohui. <sup>13</sup>Ajjaro namidsa omadicadsama najaro marinaja pajissacca tetideni ajima-jeranijine tiadeni mari

mari odsanapoccanijine bica tani, onajaro. <sup>14</sup>Ia Medsede Jesocristo pajissa ohuadsa ahuato inanajaropi ajjaro namidsa occa madie jicabote nani. <sup>15</sup>Nadsapi occa marinaja tetideni ajimamana-jeranijine dissera odsanapoccani. Odsosqueni nattini naqui najarodsa tibodideni huatomamana-dsanaponijine, onajaro.

### **Jesocristocca deni tojehe qqui toquinajari tahimarideni**

<sup>16</sup>Aji ia tiadeni maridepi ia Medsede Jesocristocca dacorehe tahimarini, pohua ccaronapomahijine tahimari naqui tiadeni mari icanabaqqijaro. Najaro marinajapi ponima maidsehecca ima inahatomanajarossa nejerani. Ia Medsedecca deni tojehe pajissa inoccodsa qqui inajarora tiadenidsa ecomerajaro. <sup>17</sup>Iapi Abi Dio Pohua Bedi Jeso deni inanahi qqui inade. Dio pocca deni tojehe, pocca biquehe Pohua Bedidsa inanadsapi Pohua Atti ajama najaride: –Ajajaripa occa ejedeni. Pahuadsa ohuati huana tajaro. Pahuadsa ohuatidseri najaro –najaride Dio. <sup>18</sup>Ia Jesodsa ssono bicanihuaji jajemorajarora memehuaji Dio Atti mohuini mittaronani imittajarode.

<sup>19</sup>Nema nani qqui onadsapi Dio Atti cacomeraqquri najaridenicca dsodoniji icajjarodsa: –Pajissa jeranitide –onejerajaro. Najarodsa pajissa onanissa tajaro. Najaro poccadeni dsodoniji tetideni ajimamana-jeradsa tibodidenidsa dacoraji. Poccadeni dsodonijipi pina jojororo dsidsinidsa ssiajadsanapojarissa najaro. Pina ssiajaccabadsico bedi cassiajajonadsapa

ssiejene tossiajabaquijarissa nanitohui nidsa ia Medsede Jeso-cristo ccanidsapa pocca biquehe tiadenidsa tojanitohui. <sup>20</sup> Ajjaro marinaja timittamananissa taji. Aji Dio Atti cacomeraquiri najaridenicca dsodonijidsa: –Pajissa Diojine dsodo quinajaria –tiquinaji. –Madija pohuadeni bodicca ima dsodo quinajari –tiquinejeraji. <sup>21</sup> Jehe, Dio Atti cacomeraquiri najarideni Dio Atti ehecomeraridsamana najaropi pohuadeni tohuini quinahicca jerani. Pohuadeni bodidsa: –Ajima onanana –quina-jarahi. Dio Corime pohuadeni bodideni acco icamabaquidsana Dio Pohua jipa tahiccara ehecomeraridsamana najaro.

**Maidsehe mamaride  
tahimarideni**

*Jodacca 4-13*

**2** <sup>1</sup> Maittaccadsama Isaraeri potemahideni madimana-podsapa maidsehe huahuatideni pohuadenidsa animanahi quinade. Pina Dio Atti cacomeraquiri najaridenissa quinaraha mamaidsadedeni. Jidapana timadimanadsa naco tiadenidsa maidsehe mamaridedeni bacco quinahitohui. Tiadeni mari tocanabaquimana-dsapa pina marinaja pajissaccassa naraha maidsehe quejemajaro. Poccadeni marinaja tabaccora tajarojine ticcadeni jeheniji totabacoranitohui. Ia Medsede Jesopa pohuadeni inassiajabaquihijine dsoquejari. Naraha pohuadsa: –Ia tonassiajabaquihijine pajirahi –quina-jarajari. Nama quinadsapa pohuadenidsa najidsohue amadsati bacco tanitohui. <sup>2</sup> Maidsehe

mamaridedenicca madijepi tabaccora tajaro. Pohuadeni tohuini quinahiccadsara disseraquiri najari. Madija mota huapi taha poccadeni maidsehedsa toquejena-dsapa pina poccadeni madiessa quinahitohui. Najaridenijinepa madija ohuahadeni naco Jesocristo tahimari pajissaccadsa attideni tabaccora tadsa atti atti quinahitohui. <sup>3</sup> Maidsehe mamaridedenipa dsinirotohui disseraquiri nahi. Pohuadenipa tiadeni tocamaiadsabaquimanadsa ticcadeni dsiniro pohuadenidsa totojanitohui. Naraha tahidedsama poccadeni ima tabaccora tani Dio nahato tapodsapa najidsohue oppina tanicca pohuadenidsa inajorapojaro. Nidsa pocca huadie tojadsapi dsori tocanire-jarahitohui.

<sup>4</sup> Maittaccadsama naco Diocca dodosse tabaqqi memehuajicca mota imasiri tonanamana-dsapa poccadeni imasiridsa Dio: –Epejena, ohuati ajimani –najarajari. Paja ettajobaquiridsapa \*najidsohue jiquejeranihuaji hua idsimajari. Cadenadsa bijideni jore naha dsidsini oppina tanidsa inamadibaquijari. Nidsa madija huapimacca ima cattemanijinecca huada bacco tadsana najidsohue denima oppina tanicca cajimanahitohui. <sup>5</sup> Najaro imassa najaro naqui maittaccadsama ajjaro dsamadsa madimanapojarideni tabaccorehedsa disseraquiridsapa Dio poccadeni imasiridsa: –Epejena, ohuati ajimani –najarajari. Nadsapa ppani imeni dosse inadsa tojicajari. Najaro ima tojadsapi \*Nohuena Dio inassiajari. Pohuapa madija Diodsa

madimanahissa tahijine mari mari ihicanabaqqui naraha ja quina-jarajari. Naraha pocca madija 7 quina-jaridenina pohuadsa tocassiejera-jari.

<sup>6-8</sup>Dsotode odsa panani \*Sodoma, Comoradsa madimanajarideni naco Dio inajicajari. Najaro ima tojadsapi \*Rotena Dio inassiajajari. Madija huapimapa pohuadeni tohuini quinahicca tabaccorehedsa madimanaraha Roteпа Diodsa madihissa tajari. Madijadenicca tabaccorehe pohuadsa ocassera taraha nama naha madijari. Poccadeni



tabaccorehe qqui tajari, mittajari dsadsanapo nadsapa bodi oji naha madijari. Nadsapa najarideni naco Dio inajidso-baqquijari. Poccadeni odsa panani Sodoma, Comora naqui huapima madijama Diojine diji tocanirehissa tadsapa ononedenira tojajaro. Diojine nema najaropi dsotodedenicca tabaccorehedsa madimanajarideni bodideni huatoma-manahijine. –Pajissa, Diopa imasiri tonanamanajarideni inajidsobaqqui tahi. Iadsa naco nama narana –quinahijine, onajaro.

<sup>9</sup>Jehe, ia Medsede Diopa Pohuadsa disseraqquri najaridenidsa ima ocassera tanicca inatappanijine nahato tajari. Tabaccorehe inamanajarodeni naco inajidsobaqquihijine nahato tajari. Pohuajine najidsohuedsa madimana-dsanapodsapa nidsaranibote \*madija huapimacca ima cattermanijinecca huada bacco toquinahitohui. <sup>10</sup>Aja madija tabaccorehe pohuadeni tohuini quinahiccadsa disseraqquri najarideni, aja Dio Attidsa iboqquri najarideni, aja cacahuehe cajimanageri attidenidsa iboqquri najarideni huapimadsapi najidsohue denima oppina tanicca ssonarinitohui. Aja maidsehe mamaridenenipa huaribodeni sibaqquri najari. Cappineraqquri nadsapa: –Ohuana nahato onajaro, deni ojani –quinajari. Diocca dodosse tabaqqui memehuajiccadsa naco tamassode cappineraqquri najari. <sup>11</sup>Naraha Diocca dodosse tabaqqui manaco maidsehe mamaridenenidsa tatamasso quina-jarajari. Pohuadenipa deni toquejenajari, denima dacoraqquri naraha Dio bacchohuaji

maidsehe mamaridedeni tahimari-deni huati toquinadsapa attideni tabaccora taniccdasa huati toquina-jarajari.

<sup>12</sup>Maidsehe mamaridedenipa bodideni huatohujine ssamo-qquiri najari. Pina banidenissa quinajari. Pihuadeni tohuini quinahicca tohuira disseraquiri nadsapa pahuama madimanageri. Ima pajissacca mittamanahissa tajaradsapa najaro imadsa attideni tabaccora tadsa atti atti quinajari. Najaridenipa jicahitohui. Pina bani tocatojadsa madimanagera huadidijajine dsodsoquemanagera najarissa quinahitohui. <sup>13</sup>Pohuadenijine madija ocasserani ahuananageri manaco pihuadeni naco ocasserani imeni ahuananageri hitohui. Cappineraquiri nadsa ahuatonidsa pihuadeni tohuini quinahicca tabaccorehe ihinanaridsamana najaro. Nama quinadsa huatidsemanaraha ssamoquiri najari. Aji tiqueriquimananidsa naco tiadenidsama jai tojedsimaraha poccadeni imadsara huatidsemanajari. Pihuadenijine ima tabaccora tani qqui tiquinadsapi ticomehimanajaro.

<sup>14</sup>Pohuadenipa amoneje qqui toquinadsa tohuini incomamanagera dsapi pina ijananagera najaro. Imasiri tonanade neboboraquiri najari. Aja jehenijirideni japari tajarodeni icamaidsabaquimanadsapa imasiridsa toquejenani tahi. Pihuadeni bodidsa tohuini incomamanagera dsapi pihuadenidsa tojanijine nahatoquiri najari. Namajidede rajaripa pajissa Dio inajicahitohui. <sup>15</sup>Diocca jahui bicaridsa huere tojidsamanadsapa pina jano toquejenanagera quinajari.

Poccadeni imapi pina Baramicca imassa najaro. Baramipa Behoro bedi, maittaccadsama madipojari. Najaripa Dio Atti cacomeraboteraha dsinoro cajihijine tohuini nadsa tabaccorehe tonanajari. <sup>16</sup>Naraha Dio johua icanageri. Najaro imapi ajima najaro: Baramipa pocca bojo idenidsa huittaridsa toccaraha Diodijine pocca bojo attini pina madija attissa nadsa pihuadsa huati huati tajaro. Najarodijine Baramipa pocca tohuaribo sibehe inebojaro.

<sup>17</sup>Maidsehe mamaridedenipa pina passo odinica sse tajarossaqquinajari. Pina meme essenijojodejine ponima toccarossaqquinajari. Poccadeni maidsehe mananagera dsidsini oppina taniccdasa madimanagera dsanapohuitohui. <sup>18</sup>Attideni deni tojaniccdasa huati huati toquinaraha pahuama huati huati toquinajari. –Ia tohuini inanica inanagera oppinera tani –quiquinanageri. Pihuadenijine madija imasiri cajimanageridenidsa tohuajimanagera dsatipa tabaccorehe dsa toquejenanageri. <sup>19</sup>–Marinajajirehe timadimanagera tani. Tohuini tiquinanagera tinanagera oppinera tani –quiquinanagera pajissa jerani. Pihuadenipa tabaccorehecca dodosse toquejenanagera najari. Najaro tabaccorehe pihuadeni dossede tojarodijine pihuadeni tonatabaccora-mananageri hitohui. Aja madijapa pihuadeni dossede tabaccorehe dsanagera dsatipa toquejenanagera tahi quiquinanagera. <sup>20</sup>Jesodsa jehe quiquinanagerideni mota naco tabaccorehecca dodosse toquejenanagera tahi. Tahide ia Medsede, ia Tonassajade Jesocristodsa tocahatteradsapa ajijaro namicca tabaccorehe

inebomanajaro. Naraha dsotode tabaccorehedsa toquejenanipomadsa imasirijine jore naquimanasapa ponicca dodosse toquejenanipomajari. Madija nama quinajaripa poccadeni madie tahidecca tabaccora tajaropi ajimani. Naraha dsotodeccapi denima tabaccora tajaro. <sup>21</sup> Jaho, Diocca madie bicani tocahattera-jaradsapa epeje. Ssamoqu岸iri najarijine poccadeni madie bica tejerani. Naraha Diocca madie bicani tocahatteraraha dsotode nebomanadsapa poccadeni madie dsotodeccapi denima tabaccora tajaro. <sup>22</sup> Nadsapi ajijaro ima pamehe pajissa inanamanani ahuato tajaro: Ettepa tocapi, tocca naraha ccanipomadsapa pocca capie tojipanijari. Poroco naco japi naraha amadsati jarorohuaji toccanidsapa dehuede tojapomajari. Poccadeni tabaccorehedsa toquejenanipomahipa tabaccora tajaro.

### Ia Medsede Jesocristo ccanipomahi tahimari

**3** <sup>1</sup> Jehe ohuemecotedeni, titohuideni ohuati huana tani. Ajijaro occa ima teppepi pina tahideccassa najaro, tiadeni acco ocambaququinijine tohuini onadsa. Ohuattidsa tibodideni huatonissa tanijine onadsa dsodo onapomajaro. <sup>2</sup> Aji maittaccadsama Dio Atti cacomeraqu岸iri najarideni huati toquinapjaricca naqui tibodideni huatoma-manaji. Aja ia Medsede, ia Tonassiajade Jesocristocca dosse-nijipi pocca dodosse tabaqqui ia tiadenidsa ecomerajaro naqui tibodideni huatoma-manaji, onajaro.

<sup>3</sup> Tahidepi ajijaro ima tetideni ajima tejeraji: Dsama jicani

tohuajirajonadsapi madija tabaccora taniccadsa disseraqquri najarideni bacco quinahitohui. Najaridenipa pohuadeni attidsa tiadeni tohuattajo-baqquimanhitohui. <sup>4</sup> Attideni ocassera tadsa ajama quinahitohui: –Jesocristo pohua ccanipomahicca ima huati huati taporaha ajana ¿ccanico? Ccani-jarahi. Ajina, dsama nahatoponidsama icca idideni jicajonaja najonapohui nahi. Dsamapi jicanijine ssamo tani. Nema dsanapohitohui –quinahitohui. <sup>5</sup> Madija attideni nama quinajaridenipa ssamoqu岸iri najari. Maittaccadsama meme, nami Dio inahatopojaro tahimarini bodideni huatomanahijine jiperaqquri najari. Diopa Pohua Attidsa: –Passo, titassaqu岸iniji nami ahuatonijine –nadsapa nema naraha pajissa quina-jarajari. <sup>6</sup> Dsotode naqui Dio Pohuajine passo ppanimadsapi dsamadsa madimanapojari huapima je tocaniredsa jicajari. <sup>7</sup> Naraha jidapana aji qqui inajaro meme, namipi Diocca dossenijidsa jororonijine diji tehe jicahitohui. Najaro najidsohuepi Dio Pohua ecahuaccani. Nidsa madija huapimacca ima cattermanijinecca huada bacco tadsana Dio Pohuadsa iboqquri najarideni inajidsobaqquidsa meme, nami naqui diji tehe jicahitohui.

<sup>8</sup> Jehe ohuemecotedeni, tiadenidsa ohuati huana tani. Ajijaro ima naqui tetideni ajima tejeraji: Diodsapa huajano 1,000 (mil) nahapa pina huada ojariessa najari. Huada ojarie naqui pina huajano 1,000 (mil) ssa najaro. <sup>9</sup> Ia Medsede Diopa nama naraha madija mota

attidenipa: –Dio Pohua huati tapojarissa inananijine najo tahi. Ajana, Jesocristo ccanihicca huada tonajoni –quinajari. Naraha Diopa najo-jarahi. Mohuaradsa titohuideni madicajari. Pahuapa madija huapima paja jicarihijine jipera tajari. Ojaria dsoqquehijine naco jipera tajari. Pahuapa madija huapima bodideni cacajiquimera-dsa Pahuadsa toquejenahijine tohuini najari.

<sup>10</sup>Naraha ia Medsede ccanipomahicca huada pajissa bacco tadsapi pina bobotide icca odsadsa amadsati bacco nadsa ijabojo najarossa nanitohui. Mohuini oppinabote dacorehema tomohuidsapi meme amossi nanitohui. Memehujicca maji, abadsico, abadsico bedi naco diji taridsaha jicahitohui. Dsama nemanehe najidsohue tojadsapi ponidsa cajiridsajari huapima diji taridsaha jicadsapa amossihuajahissa tahitohui.

<sup>11</sup>Nadsama meme, nami jicani tahimarini timittamanadsapi ¿nejecoma tiquinani bica tani? Aji najidsohue tiadenidsa toja-geranijinepi Diodsara ibobora tinadsa imasiri jirehe timadimananissa taji, onajaro. <sup>12</sup>Jehe, ia Medsede ccanipomahicca huada bacco tanijine tohuini tiquinadsapi najaro huada tonajodsanapo-geranijine Diodsara tidsepedeni ijimanadsanapoji. Dio dsama inajicanicca huada bacco tadsapi jororoni pporabotejine memehujicca maji, abadsico, abadsico bedi naco huapima diji taridsadsa ssahuemadsapa amossihuaja-ridsahitohui. <sup>13</sup>Naraha ia Dio pocca madija iquejenaropio Dio Pohua huati tapojaricca meme dsati

bicani, nami dsati bicani tohuini inajorehe imadijaro. Najaro dsama dsatidsapa madija bicaququiri najaridenira imasiri jiraha madimanahissa tahitohui.

<sup>14</sup>Ohuemecotedeni, titohuideni ohuati huana tani. Najaro ima huapima tojanitohui timadimanaccadsapi Diocca jonehedsa timadimana, imasiri jirehe timadimana nanijine dissaraqquiri tiquinaji. Nadsapi Dio baccuhuaji tidomo huadsa bicaququiri, huireququiri tiquinehe tiadeni qqui tabaqquihijine. <sup>15</sup>Tetideni ajima tejeraji: Ia Medsede Diopa icassiejeranijine tohuini nadsa mohuaradsa itohui madicajari. Najaro imapi imecote bicahi Pablo naco Diojine nahatohue cajidsa tiadenidsa dsodo inapode. <sup>16</sup>Pablopa pocca ima teppe huapimadsa najaro ima dsodo inaridsapojaro. Pocca dsodoniji motapi imittaraha motapi imittanijine najo tani. Najarojine Diodsa ssamoququiri najarideni, aja jehenijirideni japari tajarodeni naco Pablocca marinaja mittamanahissa tajaradsapa pohuadenijine tojidsajaro. Aji Dio Atti dsodo nanicca naqui najarossa inanamanajaro. Pahuadenijine marinaja bicani tojidsajarojine Dio inajidsobaqquihitohui.

#### **Pedrocca marinaja jicanicca**

<sup>17</sup>Ohuemecotedeni, titohuideni ohuati huana tani. Jidapapi najaro ima nahatoto tinani. Najaro ima toja-geraccadsama tetideni huatomanehe timadimanaji. Nema tiquinejeradsapi aja tabacorehe totonanadedeni poccadeni maidsehedsa tiadeni joca tanibaququimanarana.

Diodsa jehe tiquinanissa tajaro dacoraraha huere tijidsamanaanana. <sup>18</sup>Naraha ia Medsede, ia Tonassiajade Jesocristodsa tinoccodeni tojidseranissa tanijinepi disseraqqiri tidsanapomanaji.

Pocca tohuati huanehedsa ticcadeni madie tobica-dsanapoji. Jidapana, dsotode naqui pohuadsa etidsedsa: –¡Bica tinani! ¡Deni tijani! –ihidsanapo nana, onajaro. Pajissa nema nana. Epejeni.